

INTE DEDICAZION DE BASILICHE DI S. MARIE DI AQUILEE

Ai 13 di Lui dal 2017

Memorie

Lis arcidiocesis di Gurize e di Udin, erêts dal patriarcjât di Aquilee soprimût dal 1751, a celebrin dutune la dedicazion de basiliche di Aquilee, par vieri catedrâl de sente patriarcjâl.

La forme de basiliche, che cul so implant e esercità inte ete paleocristiane une influence inte costruzion des glesiis di largje part de Europe e ch'e met su la stesse linie l'abside, l'aule, il puarti e il batisteri, e je dal timp di Cromazi vescul di Aquilee (an 400 av.). La sacre costruzion di prime, cun dople aule e cuntun splendit mosaic par pavement, le veve fate fâ il vescul Teodôr viers il 320. Li, tai lôr timps, a cjatarin acet paris de Glesie une vore celebrâts, come Atanasi, Jeroni e Ambrôs.

Il patriarcje Massenzi (811-830) al riparà in part la basiliche ch'e stave colant.

Chel che le rinovà di fonde fûr al fo Popon, che le consacrà cun grande solenitât ai 13 di lui dal 1031. Il patriarcje Marquart (1365-1381) al riparà lis feridis dal taramot dal 1348 e le puartà inte forme che le viodin cumò. Tal florî de Rinassince si insiorà il presbiteri.

La basiliche sul imprim e je stade dedicate a la Sante Virgjine Marie Mari di Diu, po a Marie Sunte in cîl e ancje a S. Marc e ai Ss. Ermacure e Furtunât.

* * *

La nestre tiere dal Friûl e je cognossude in dut il mont pe basiliche mari di Aquilee che vuê o celebrin la dedicazion. Bisugne però zontâ che des monts al mâr a florissin culî tantis e tantis gleseutis une plui antighe, plui bieles, plui colme di storie di chê altre.

E se vuê e gjolt la glesie mari, vuê a àn dirit di gjoldi insieme cun jê, ancje dutis lis fiis nassudis di chel grim.

Però la liturgjie cu lis sôs leturis e imagjinis e vûl cuasi fâ nus smenteâ i mûrs materiâi des nestris glesiis par visânus che la vere glesie e je la comunitât dai cristians tal lûc che o vivin.

E chê comunitât, la liturgjie le clame: citât sante - nuvice che si furnis pal so nuviç - tende di Diu cui oms - cjamp di Diu - cjase di Diu - templi di Diu - cjase dal Signor - cjase spirtual - lûc di preiere - templi dal Spirtu sant - la tô glesie - nuvice di Crist - mari in gjonde - Gjesù però ur fevelave dal santuari dal so cuarp.

Ce vino di dî? Che nol covente torseonâ in lûcs e grops e spiritualitâts forestis, parcè che o vin la nestre famê e chê nus baste, se o crodin in jê, se i volin ben pardabon e se si sacrificin par rindile come une nuvice che si furnis pal so nuviç.

La glesie, chê vere, e je la comunitât li che o vivin e che o vin di dâ une man par rindile simpri plui seont il spirt di Gjesù.

Antifone di jentrade

Cf. Ap 21,2

O viodei la citât sante, la gnove Gjerusalem,
a vignî jù dal cîl, di Diu,
prontade tant che une nuvice che si furnis pal so nuviç.

O ben: Cf. Ap 21,3

Ve la tende di Diu cui oms! Lui al starà framieç di lôr,
e lôr a saran il so popul, e lui al sarà il Diu cun lôr.

Si dîs Glorie a Diu.

Colete

Diu, che tu ti sês indegnât di clamâ la Glesie tô nuvice
par ch'e ves la gracie midiant de fede
e la devozion midiant dal to non,
danus a nô, erêts de Glesie di Aquilee,
di celebrâ cun religjon l'aniversari
de dedicazion di chel templi gloriôs
par che, volinti ben e cjaminant su lis olmis dai nestrîs paris,
o podin rivâ cu la tô guide ai bens dal cîl che tu nus âs imprometûts.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

1 Cor 3,9-11.16-17

O sês il templi di Diu.

Par fâ madurâ la comunitât cristiane li che o vivin, S. Pauli nus met dôs condizions: 1) ognidun al à di stâ atent a cemût ch'al fâs su; 2) no si pues butâ nissune fonde diferente di chê ch'e je za, ch'al è Gjesù Crist.

Chest, butâ lis fondis de glesie, tai nestrîs paîs cence predi al deventarà simpri di plui esigence, prerogative e responsabilitât di un om, di une femine, di un groput di int.

Il cristian di vuê, al cjale, al riflet, si domande: cemût preparâsi, cemût començâ a formâ la comunitât, il templi di Diu, ch'o sês vualtris ?.

De prime letare di san Pauli apuestul ai Corints

Fradis, vualtris o sês il cjamp di Diu, la cjase di Diu. Seont la gracie di Diu che mi è stade dade, jo o ai butadis lis fondis come un architêt di mistîr; po un altri al fâs sù parsore. Però ognidun al à di stâ atent a cemût ch'al fâs sù. No si pues butâ nissune fonde diferente di chê ch'e je za, ch'al è Gjesù Crist.

No savêso ch'o sês templi di Diu e che il Spirt di Diu al è a stâ in vualtris? Se un al bute jù il templi di Diu, Diu lu butarà jù lui. Parcè che al è sant il templi di Diu, ch'o sês vualtris.

Peraule di Diu.

SALM RESPONSORIÂL

dal Salm 121

Anin contents te cjase dal Signôr che e je la glesie materiâl; ma anin, ancjemò plui contents, te comunitât cristiane dai nestrîs paîs.

In chest, i prins a gjoldi no vin di sedi noaltris, ma un tribulât, un profugo, un biadaç, un escludût di ducj e che al cjate ripâr fra di nô.

Dome cussì o sin la vere glesie e o podin lâ contents te cjase dal Signôr.

R. Anin contents te cjase dal Signôr.

Se cjantât: Il cjant dai salms responsoriâi, p. 279.

Ce ligrie cuant che mi an dite:

“O larin te cjase dal Signôr”.

I nestrîs pîts bielzà si cjatin,

Gjerusalem, dentri des tôs quartis! R.

Gjerusalem ch'e je stade fate

come une citât ben vuaiade.

Lassù lis tribûs a levin,

lis tribûs dal Signôr,

seont la leç che Israel al à vude

di laudâ lassù il non dal Signôr. **R.**

Lassù a son prontadis lis sentis de justizie,
lis sentis de cjase di David.
Bramait la pâs a Gjerusalem:
chei che ti vuelin ben ch'a vedin furtune! **R.**

SECONDE LETURE

1 Pt 2,4-9

Ancje vualtris, tant che pieris vivis, lassaitsi doprâ par fâ sù une cjase spirituâl.

Culî l'apuestul Pieri al clame i cristians pieris vivis a condizion di jessi tacâts a Crist, pierre vive, butade di bande dai oms ma sielzude e preseade denant di Diu.

In chestis peraulis o olmìn la passion e risurezion dal Signôr. Bisugne cjâlâ e unîsi a chê crôs par podê jessi predis sants e podê ufrî sacrificis spirituâi che Diu al à agrât midiant di Gjesù.

Gjesù e nissun altri al è l'unic cjantonâl che al ten sù la glesie e nus rint gjernazie sielte, i predis e i rês, la int sante, il popul che Diu si è cuistât.

A son realtâts masse grandis par nô e che no rivin a capî a colp. Ma, prein sore cun fiducie e un lum dal Spirtussant al rivarà.

De prime letare di san Pieri apuestul

Benedets, tacaitsi daprûf di lui, pierre vive, butade di bande dai oms ma sielzude e preseade denant di Diu. Ancje vualtris, tant che pieris vivis, lassaitsi doprâ par fâ sù une cjase spirituâl, par jessi predis sants, in mût di podê ufrî sacrificis spirituâi che Diu al à agrât midiant di Gjesù Crist. Di fat al è scrit: "Ve che jo o met in Sion une pierre di cjanton, sielte, preseade, e chel ch'al crôt in jê nol restarà malapaiât".

Onôr duncje a vualtris ch'o crodês: ma par chei che no crodin: "la pierre che i muradôrs le vevin butade di bande e je diventade un cjantonâl, un clap che si inçopedisi e une pierre ch'e fâs colâ". Lôr s'inçopedin parcè che no crodin a la peraule; al è il lôr distin. Vualtris invezit o sês la "gjernazie sielte, i predis e i rês, la int sante, il popul che Diu si è cuistât par ch'al conti lis grandis voris" di lui, che us à clamâts dal scûr a la sô lûs sflandorose.

Peraule di Diu.

CJANT AL VANZELI

2 Cr 7,16

R. Aleluia, aleluia.

Jo mi soi sielzût e o ai fat sant chest templi, al dîs il Signôr,
par che la mê presince e resti li par simpri.

R. Aleluia.

VANZELI

Zn 2,13-22

Ur fevelave dal santuari dal so cuarp.

Un gjest provocatori di Gjesù fat a Gjerusalem, li dal templi, dongje la Pasche, cun va e ven di pelegriins... Un intervent imediât des autoritâts competents, un interogatori, la polemiche e Gjesù che ur fevelave dal santuari dal so cuarp. Ma chest ancje i dissepui lu capirin dome plui in ca cuant che lui al resussità dai muarts.

Il templi vêr, chel di Diu, al è Gjesù Crist stes: in lui e je la plenece di dute la divinitât e umanitât. Plui o stin te cognossince di lui e tal so Spirt e plui o jentrin tal vêr templi. Unîts a lui, o diventin templi dal Spirtussant ancje nô, come che nus à dit s. Pauli te prime leture: Parcè che al è sant il templi di Diu, ch'o sês vualtris.

Dal vanzeli seont Zuan

E jere dongje la Pasche dai gjudeos e Gjesù al le sù a Gjerusalem. E al cjatà tal templi int ch'e vendeve bûs, pioris e colombis e chei ch'a sgambiavin bêçs sentâts tal banc. Fate une scorie di

cuardins, al parà fûr ducj dal templi, ancje lis pioris e i bûs, e al sparniça i bêçs di chei ch'a sgambiavin e ur ribaltà i banes, e ur disè a di chei ch'a vendevin colombis: «Puartait vie di chi dute cheste marcanzie e no stait a fâ de cjase di gno Pari une cjase di marcjât». I siei dissepui si visarin ch'al è scrit: «La passion de tô cjase mi consumarà». I rispuinderin alore i gjudeos e i domandarin: «Ce spieli nus mostristu par operâ cussi?». Gjesù ur rispuindè: «Sdrumait chest santuari e jo in trê dîs lu tornarai a fâ resurî». I diserin alore i gjudeos: «Chest santuari lu an fat in corant'agns e tu in trê dîs tu lu fasarâs resurî?». Lui però ur fevelave dal santuari dal so cuarp. Par chel, cuant che al resussità dai muarts, i siei dissepui si visarin che lui al veve dit chest e a croderin a la Scriture e a lis peraulis che al veve ditis Gjesù.
Peraule dal Signôr.

Cuant che cheste fieste e cole di domenie, si dîs O crôt.

Su lis ufiertis

Danus, Signôr, di presentâti cun umiltât cheste ufierte
e di celebrâ cun dute la gjonde
e la passion dal nestri cûr
la zornade aniversarie de dedicazion,
par podê servîti simpri cun fedeltât,
tu che tu nus dâs la vite e la salvece.
Par Crist nestri Signôr.

Prefazi

Il misteri de Glesie, nuvice di Crist e templi dal Spirt

V. Il Signôr cun vualtris.

R. E ancje cun te.

V. Adalt i cûrs.

R. Ju vin viers il Signôr.

V. Vin agrât al Signôr nestri Diu.

R. Al è just e sacrosant.

Al è propit just e sacrosant, al covente e al da salvece
vêti agrât simpri e dapardut,
Signôr, Pari sant, Diu onipotent e eterni:
Te tô munificence
tu ti indegnis di vignî a stâ tun lûc di preiere
e, cul jutori de tô gracie che mai nol mancje,
tu fasis di nô il templi dal Spirtu Sant,
splendent di lûs pe vite buine dai tiei fîs.
Ma tu santifichis cence polse ancje la tô Glesie,
nuvice di Crist e prefigurade in lûcs visibii,
par che come mari in gjonde pe sdrume de sô fiolance
e puedi rivâ inte tô glorie tai cîi.
Par chel, cun ducj i Agnui e i Sants,
ti laudin, disint cence polse:
Sant, Sant, Sant al è il Signôr Diu di dut il mont...

Antifone a la comunion

Ancje vualtris, tant che pieris vivis, lassaitsi doprâ
par fâ sù une cjase spirtuâl, par jessi predis sants.

Daspò de comunion

Fâs, Signôr, che i tiei fedêi,
tornâts gnûfs cu la gracie e cui sacraments,
a mertin di cjapâ il don dal Spirtu Sant
par che, crodint tal Fi di Diu,
a ricognossin il nuviç de Glesie, Crist Signôr.
Lui ch'al vîf e al regne tai secui dai secui.

* * *

Tal libri – Hosanna:

Messe “Ss. Ermacure e Furtunât”, *pagjine* 68;
Su fati dongje, int di sant Ermacure, *numar* 206;
Da font de mê anime, *n.* 320;
Christus vicit, *n.* 147;
Salm 121: Ce ligrie, cuant che mi àn dite *n.* 270.

* * *

*La glesie e je glesie dai puars tal spirt e dai pecjadôrs che a domandin perdon;
no je dome chê dai juscj e dai sants;
anzit e devente dai juscj e dai sants cuant che ancje lôr
a sintin di jessi puars e pecjadôrs.*

Pape Francesc

* * *

Domenie 16: As 6.00 sore sere te basiliche di Aquilee, messe di Avôt dal Friûl ai Ss. Ermacure e Furtunât, seont la tradizion di ogni an.

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an A, Ed. Arti Grafiche Friulane.*
- * *Par domandâ chescj libris scrivêt a info@glesiefurlane.org*